

PAAVORO ITIONCAQUENERI

TITO

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaquenerigueti Tito. Irocashi itioncacotaqueri irira Paavoro otsipaequi paperiqui (Ya. 7.57–8.1; 9.1-31; 13.1–28.31). Paavoro icantacotaqueri Tito itioncacaantajia-querigueti Garashiaquitica aisa itioncacaantaquerogueti paperipae icantajitica 2 Corintoquitica aisa 2 Timoteo (2 Co. 2.13; 7.6, 13-14; 8.6, 16, 23; 12.18; Ga. 2.1, 3; 2 Ti. 4.10) Tequeratagueti intionqueroji Paavoro ocatica paperi itioncacaanquero otsipapae 11 paperipae choocajianquitsica paperiqui icantajitica *Tsavetacoquerica Jesoquirishito*. Pajinigueti itioncacaantaquerogueti Paavoro ocatica paperi itioncacaantaqueneri Timoteo, iroquetica itioncacaantaquenerica. Itioncacaantaquero ocatica paperi ajagantsiniqui 63, ichoocaquegueti quepatsiqui icantajitica Maseronia.

1 ¹Naroguenti Paavoro antinirica Aapani Irioshi ashintajanaca, aisa naroguenti itigarancane Jesoquirishito. Iriatimpa itigarancaquea nontsaroven-tacaajiaquempari maasano icoguiajia-queca Aapani Irioshi, cameetsanijite intsatimentajiaqueronijite Quenquetsa-tsarentsimaajaca incomajatashitanta-quemparoca. ²Aisa intsamajajiaquero-quea iroarointaquequea maasano tsaromentajiacarica inchoocaguiteniquea Irioshimajacaqui, aatoquea imetojaji. Irraquea Aapani Irioshi teequea intojeimatempaji. Paesatoniqui tequeratagueti onchoocatimateji, icanque aatoja imetojitsi maasano quericaca tsaromentajiaquemparineca Quirishito, incoguitempani inchoocagui-teni iriatimpaqui. ³Imaicaquea imaica jac aapojaca savincaguiteri intsatantaji-

quemparoca maasano Iguenquetsatsare Aapani Irioshi Meshiacojiaajica. Irootaquequea itigarancuimenquena-quea nontsavetacotaqueriqueate Jesoquirishito, noncamanqueriquea maasano.

⁴Notioncaquempiquea aviatimpa Tito napitsarorentarite, naroguentiquea tsaromentacaaquempica nopeantajim-pica nirijanitemajaca. Namanacoven-quempiquea incavintsajamajaquempini-jite Aapani Irioshi aisa Jesoquirishito Meshiaajiacajica, noninquequea inchoocatacaaquempi cameetsa aatonijite taaca opaji pishoshoguite-venta.

Yantavaequequeate Tito Queretaniqui

⁵Oraqueate nojocanaquempigueti oraniqui Queretaniqui nocanquempiquea

pinteroncaguetajerojate maasanopae tequerataca anteronqueji. Aisa nocanquempiquea querocaguete oraniqui guinteninintsipaequi icapioicapinijiacaguete apitsarorentarijiate, paajiaquenerijate quempoguijajiaquerineca, pinquempeta-caamajaquemparoja nocanquempica.

⁶Irraquea quempoguijajiguirica tsarorentajatsica incoguitempanija incomajamajaquempaquea iramenajitaquerinijite inchoocamajaque cameetsa. Irampaniron-quemparoja imanquigacaca. Irraquea irijanijiate intsarorentamajajiaquemparija Quirishito incomajamajaquempaquea, aisa intsajiaqueriquea iriri aatoja ipigapigaata-ritsi. ⁷Irraquea quempoguijajiguirica tsarorentajatsica iriguentiquea savicaventiroca maasanopae inintaguetica Aapani Irioshi, irootaquequea nocantantacaca incoguitempanija incomajamajaquempaja aatoniji ochoocatitsi incantimentajiquerimeca. Aatoquea yaventacotatsi, aatoquea itijerequitatsi, aatoja ishinquiguitani, aisa aatoquea yaashitantatsi. Aatoquea yamata-vijiguiritsi itsipapae iraaquenijite imentaquipae. ⁸Cameetsa irajjivaqueriquea iroguisavisaviitavaqueriquea coraquecoraquejianquitsica itsovironaquitequi. Irishineventamajaquemparoquea cameetsaripae, intampishitashiguetaqueroquea maasanopae covaequisherentsipae, incomajamajaquempa, irinetsanamajataqueneri Aapani Irioshi, aisa iramenanontamajaquempaja cameetsa incomajamajaquempañijite. ⁹Irraquea quempoguijajiguirica tsarorentajatsica aatoja icantashitatarotsijate Iguenquetsatsare Aapani Irioshi, manaqueate inquenquejamajaqueroquea cameetsanjite iragavejaquenijite intsatacaajiaqueriquea itsipapae, aisa iragavejaquenijite irimajeretacaajiaquerinijite maasano cantashitatiacaroca Quenquetsatsarensimajaca.

¹⁰Choocatarite icaramirincavaequetarite pigapigaatantatsica, manaqueate

icantashijiacaro intati yamatavijanti-gueti. Irioiatarite quempetanquitsica imaica cantajianquitsica maasano tsarorentajatsica iroguijatacojianajero itsatacaantica joriojia icantajiaque intotsaiquimashitacaantajiaquempa maasanojia. ¹¹Irirajia quempejiaqueroica imaica iintsija iramicacaaajitempari, manaqueate yovashiantacaagarantajiaqueri tsarorentajiavetatsica, iquejeta-caajitsitaroquea imanquigarejia aisa irijanijiate. Itsatacaantamampeajianaqueroquea intati, teetarite oncameetsateji, manaquea inintajiaque iraaantajiaquemparo imentaquipae.

¹²Coramani ichooaque tsavetantsica Queretaquiticani. Iriatimpa iquenquetsatacojiaqueri igonorojia icanque: "Ari icojiaca Queretaquitica iriguenti tsojeajatsica, teequea impintsatacotantajiguempaji quempejia-caquea chaonarijite. Iriguentijiaquea shecajanti perantijia." ¹³Icantamajataqueshiatsi. Irootaquequea nocantantaquempica pincantomajamajaterija irirajia quempejianquitsica imaica cameetsanjite intsarorentamajatanaquemparinijite Quirishito, ¹⁴aatonijite iquemisantajiajiritsi joriojia tsavetamampeajigaroca iquenquejashijitacaca intati. Aisa pincanquerijate aatojate iquemisantajiguiritsijate itsatacaantajiaquea itsipa pitsocapitsatanacaroca Quenquetsatsarensimajaca. ¹⁵Irraquea comajari icocaniquea iquenquejacomajaquero maasanopae, manaquea icomajatacocaroc, cotanquitsiquea iriraquea teeca incomajatempari teeca iraaavajeroji iroomajatsica icancaniquea teequea incomajatacotemparoji maasanopae. Manaquea ocovaeguishetanaca iguenquejane, aisa chagashirentavequemparimeca aatoniji icovaeta manaquea ocovaeguishetanaca.

¹⁶Iriatimpajia icantajiaveca itsatiri

Aapani Irioshi, cotanquitsiquea ipeacaa-guishejiacaca onigaantajianaqueri teemajaca intsateriji. Iriguenti coguishe-rimajaca, tee inquemisantanteji, teequea intsatimajigueji irinetsanajiaqueroquea cameetsaripae.

**Quero ancojiaquempani
anchoocajiaquegueti cameetsa**

2¹Aviatimpaquea pintsatacaantaque-gueti pintampaticamajatanaquero-jate Quenquetsatsarensimajaca. ²Iriraji-aquea quenquevarimajjiananquitsica aatoja ishinquitatsi, intampishitashijia-queeroquea maasanopae covaeguisherent-sipae, irishineventajiaquempari cameetsaripae, intsariventamajajia-quepari Jesoquirishito, impintsatanta-jiaquempa, incoguitempani. ³Ariqueate onquempejiaquempa quea quenquevaromajjiananquitsica pincantajiaquero-quea oncomajamajajiaquempajate, aisa aatoja ocantashiguetsatsi intati, aisa aatoquea oshinquitatsi. Iroguentiquea ontsatacaantajiaque cameetsaripae. ⁴Onquejetaqueroqueti agavejajiaque ontsatacaajiaquero apimanquigarojiate tequerataca onquenquevaromajateji ompintsamajataquemparija manquigata-roca aisa irijanijiate. ⁵Aisa ontsatacaaji-aqueroquea onquenquejamajaqueroni-jite cameetsaripae, oncomajamajaquem-paquea, onetsanajiaquero otsovirona-quite, oncavintsajantajiaque, aisa onquemisantajiaqueri manquigataroca. Noncantantajiaquempani imaica aatonijite icantaguishetacojitirosi Iguenquetsatsare Aapani Irioshi.

⁶Ariqueate pinquempejiaqueriquea tequerataca inquenquevarimajjigueti pincantajiaqueriquea intampishitashijia-queeroquea maasanopae covaeguisherent-sipae. ⁷Maasanoquea pantaqueca pincomajatimenquempari cameetsaniji inquejianaquempaniji. Pintsatacaajia-

querigueti pintampaticamajatero, pinetsanamajateroja. ⁸Pinquenquetsatsi-temparo cameetsaguetatsica aatoniji ocoocati incantacoguisшетimentajitem-pimeca, manaquea impashiventana-quepa ticaavequempimeca iramenajia-quegueti tee onchoocatimateji.

⁹Pincantajiaqueri yashintajitacaca irinetsanajiaqueroquea maasano incanta-jiaquerica ashincarica cameetsanijite iroguishinejajiaqueriniji, aatoja ipigatsa-jencataritsi. ¹⁰Aisa aatojate yaitsitiritsi, manaqueate intsamajaqueri ashincarica aato yamatavtiritsi, cameetsanijite iramenajiaqueni-jite maasano oganejen-cavaeca Quenquetsatsarensimajaca tsavetantaquerica Aapani Irioshi Meshiajiacajica.

¹¹Yonigaanquerotari imaica Aapani Irioshi icavintsajajiaquerigueti maasano caquinteguetsatsica inintantacaca irimeshijiaqueriquea. ¹²Irootaquequea atsatantajiacaca cameetsanijite avashiantantajianacaroca apeacaagui-shejiaveca taaca opajitapae covaegui-sherentsipae aatonijite aquempejigaritsi teeca intsariventajiguempariji iquenquejaguishejiaqueroquea taaca opajitapae, manaquea antsajiaque antampishitashijiaquero maasanopae covaeguisherentsipae, anchoocajiaque cameetsa, ancoguitempanija antsaroven-tamajaguitemparini Aapani Irioshi achoocajiaquegueti quepatsiqui. ¹³Aatimpajia arimpaquea ancomajama-jatanaquempani aguijaguijaitavajero-gueti onetsanajiaquempagueti oguishinejaveatacajica: iroguentiquea savincaguiteri ironigaantantajempaca Arioshite agavejamajatatsica Aavajajica, iriotaque Jesoquirishito, ariquea iroganejencavaetapojajempa. ¹⁴Aatim-pajia apeacaaguishevaevecaroquea taaca opajitapae covaeguisherentsipae, cotanquitsiquea ocoramanitapojaji

imetojaventajiacaji ishetacojiajaji yoguipaquijacojiajaji yashintavecagueti ampatsini, aisa ishetacomajatajaji cameetsanijite irionijite ashintamajajiajajiniijite anintamajajiaquenijite anetsanajianaquero maasanopae cameetsaripae.

¹⁵Irootaquequea pintsatacaanteja. Pintampishitacaanque, aisa pincantomajanteja, iriotarite nintacaquempica Aapani Irioshi. Aato cameetsatitsi intojencajiguempi.

Quero incoquempani tsaromentajatsica

3 ¹Noninque pinquenequeajajajeri maasano tsaromentajatsica inquemisantajiaqueriquea majirontajatsica aisa jivajiguirica, aatojate ipigapi-gaataritsijate, manaqueate irinintanintaitanaque irantajianaquero cameetsaguetatsica. ²Aatoquea icantaguishtacotiritsi itsipa, aatoquea icatsimatantajiguitsi, manaquea impeaquempa matinari, aato yanaaguenquejanetanti, manaquea impintsajiaquempariquea maasano caquinteja.

³Coramanitari aatimpajia aritarite aquejetaca, teequea antsateji anquenequejamajajigueji, teequeate anquemsantanteji. Atimpinashirentaveca, manaquea omperavecagueti taaca opajitapae covaequisherentsipae ashineventajiavecaca. Acatsimajencajiaqueriquea agonorolja, acatsimatacotsitantageue. Aatimpa isemaneguintajitacaji, ariqueate acohacoitanaca asemaneguintavacaajanaca. ⁴⁻⁵Cotantquitsiquea ocoramanitapojaquegueti arejetapojacagueti savincaguiteri ipintsatocotantajiacarica Aapani Irioshi maasano caquintequetatsica, iquejeta-caajiacaji aatimpajia imeshiajiacaji, iriguentitari Meshiantatsica. Teequea irooquea irimeshiantajajaji iramenajiacaji acomajamajajia, manaqueate

ipintsatacojiajaji intati, irootaquequea imeshiantajiacajica. Oraqueate ishetacojiajajigueti agovaeguisherēja manaqueate oncanque jac acantashitai-ajianaja quempetaja iroaquerasano voajiajatsi, iriguentiquea cantashitajiajaji Ishire choocashirentajiacajica.

⁶Aventaventaicaritarite Jesoquirishito Meshiajiacajica, jero itigarancantacarica Aapani Irioshi Ishire inchoocashirentajia-apojacaji iragavejacaamajajiacajiqueate.

⁷Ariqueate iquempajiacaji imaica Aapani Irioshi ipintsajiacajigueti iramenajiacajiniijite quempeca teeca ancovaequishtematempaji. Imaiqueate imaica iroguentiquea aguijama-jaquequea antsipatsipaitaquempari jenoqui inquitequi ancoguitempañi anchoocaguiteni. ⁸Maasanopae ocatica nocanquempica iroguenti iroomajaca, nonintancaca pintsatacaantamajate-roja cameetsanijite maasano aventaventaicarica Aapani Irioshi irisavicaventa-majajianaqueroquea irinetsanajianaquero maasanopae cameetsaguetatsica. Caaviji anaaque ocameetsavaeque, aisa irootaquequea amitacojiguirica maasano.

⁹Imaica noncanquempi aatojate pitsipajiaritsija itsipapae pinquenuetsatavacaajiaquempaquee intati pinquenuetsatacojiaqueroquea taaca opaji teeca irooquea iroomajatsatsica, aisa aatoquea piquejetaritsi savicaventajiaqueroca iquenequeajiaquero ipajigueta-gueti choviquijianaquerica, aatoja pipigatsajencatavacaga, aisa aato piquejetaritsija catsimatimentantajigui-roca itioncacotanaquea Moishishini. ¿Arimpate amiquempite? ¿Taa opaji ocameetsatancaca? Teenica onchoocateji. ¹⁰Inchooquegueti gametsajantantquitsineca, paitempariquea pincantomajitsitempari. Aatogueti iquemisantim-pitsi pinquejetacaitempariquea aisa.

Iroompa inquejetsitajemparogueti aisa aatogueti iquemisantimpitsi pincantimentsitempari aatoja iquijajitsi picapio-capinijigagueti. ¹¹Itsajitaquetari quejeji-acarica irica mana yaacoguishetanaca, aacoguisheni icantanaca, irioquea quempetacaantanquitsineca.

Iteroncacaanajiri

¹²Ariqueate nontigarancaquerigueti Aretemashi aisa Tiiquico aviatimpaqui oraniqui pintampinaquequea poanaquequea Nicoporishiqui. Ariqueate noanaquequea ontaniqui nonchoocavaequitequeate arejevaetajempa osaajencatanajegueti catsincaguiteri. ¹³Iriraquea Senashi, guisotoguiroca itioncacoguequeca majirontaguetsica, aisa Aporoshi pinetsanamajjiavaquerijate pojocajjiavaquenerija taaca opaji

incoguitejacojiaquempaca aatonijite iteroncacojianacatsi quenavoquiron-tsiqui. ¹⁴Pincantajiguerijate apitsaroven-tarijate guintenijianquitsica oraniqui irantapinitaque cameetsaguetatsica cameetsanijite inchoocatacotimenqueniji iramitacotantajiaquemparica coguitejacomajatanquitsica, aatonijite manaqueate irisavisaviitashitaquempaquea intati aatoquea taaca opaji yantitsi.

¹⁵Maasano tsipatsipaitaquenaca ocانiqui inintajiaque pinquemacojiaqueriquea chooca iquenquejajijimpi. Pincamanquerijate maasano apitsaroven-tarijate pintsajiaquenaca choocajiana ocانiqui noquenquejajijiri. Imaica noninque incavintsajamajjiaquempi Aapani Irioshi aviatimpajia maasano.